

VENDIM
Nr.419, datë 30.4.2009

PËR PROCEDURAT E PAJISJES SË SHTETASVE PA PASAPORTË, QË NUK PËRFITOJNË KOMPENSIM NGA VENDIMI NR.366, DATË 15.4.2009 TË KËSHILLIT TË MINISTRAVE “PËR KOMPENSIMIN E PAGESËS PËR PAJISJEN ME LETËRNJOFTIM TË SHTRESAVE NË NEVOJË”

Në mbështetje të nenit 100 të Kushtetutës, me propozimin e Zëvendëskryeministrit, Këshilli i Ministrave

VENDOSI:

1. Të gjithë shtetasit, që mbushin moshën 18 vjeç deri më datën 28 qershor 2009 dhe që nuk kanë pasaportë, si dhe nuk përfshihen në skemën e kompensimit, të parashikuar në vendimin nr.366, datë 15.4.2009 të Këshillit të Ministrave “Për kompensimin e pagesës për pajisjen me letërnjoftim të shtresave në nevojë”, mund të aplikojnë, duke paguar paraprakisht një tarifë prej 200 (dyqind) lekësh, deri më 18 qershor 2009.

2. Rregulli i përcaktuar në pikën 1 të këtij vendimi, zbatohet edhe për të gjithë shtetasit, që votojnë për herë të parë dhe që kanë lindur në periudhën 19.2.1989-28.6.1991, siç përcaktohet në nënndarjen “iv” të shkronjës “b” të pikës 1 të vendimit nr.366, datë 15.4.2009 të Këshillit të Ministrave “Për kompensimin e pagesës për pajisjen me letërnjoftim të shtresave në nevojë”, por që nuk ndjekin shkollat publike.

3. Shtetasit e përcaktuar në pikat 1 e 2 të këtij vendimi, pajisen me kuponët në zyrat postare përkatëse të njësive të qeverisjes vendore pas pagimit të tarifës prej 200 (dyqind) lekësh. Në rast se njësia e qeverisjes vendore ka më shumë se një zyrë postare, pajisja bëhet në zyrën kryesore postare të njësisë, së cilës, nga Ministria e Brendshme, i vihet në dispozicion lista emërore e shtetasve, që nuk kanë pasaportë.

4. Kur shtetasi nuk është i përfshirë në listën e shtetasve pa pasaportë, mund të pajiset nga zyra postare me kuponin vetëm nëse:

a) paraqet një vërtetim nga Policia e Shtetit se nuk ka pasaportë, në përputhje me pikën 8/1 të vendimit nr.1, datë 7.1.2009 të Këshillit të Ministrave “Për pajisjen, për herë të parë, me letërnjoftim, të shtetasve shqiptarë dhe për përcaktimin e afateve e të masave shtrënguese, për ata, që nuk aplikojnë brenda këtyre afateve”, të ndryshuar ose;

b) nënshkruan formularin e deklarimit, që i bashkëlidhet këtij vendimi, ku përfshihet edhe deklarata se nuk ka pasaportë, nuk ka përfutur kupon nga ndonjë skemë kompensimi dhe se mban përgjegjësi penale sipas nenit 144 të Kodit Penal.

Formulari i deklarimit ose vërtetimi i lëshuar nga Policia e Shtetit dorëzohen në zyrën e postës në çastin e dhënies së kuponit, të vulosur me vulën e postës. Ky kupon mund të përdoret për aplikim vetëm nga shtetasi përfitues, sipas këtij vendimi. Formularët e deklarimit, të nënshkruara, dhe vërtetimet e lëshuara nga Policia e Shtetit administrohen nga Ministria e Brendshme.

5. Vlera e mbetur prej 1000 (një mijë) lekësh duhet të paguhet nga personat përfitues, sipas këtij vendimi, brenda 6 muajve nga data e aplikimit. Paga kryhet pranë zyrave postare, për llogari të Buxhetit të Shtetit. Në rast se personi nuk kryen pagesën për shumën e mbetur brenda periudhës 6-mujore, shpallet debitor dhe vjelja e detyrimit bëhet sipas procedurave përkatëse.

Personat, që përfitojnë sipas pikave 1 e 2 të këtij vendimi, përjashtohen nga zbatimi i këtij detyrimi, nëse paraqesin dokumentet e aplikimit, sipas shkronjës “dh” të pikës 4 të vendimit nr.366, datë 15.4.2009 të Këshillit të Ministrave “Për kompensimin e pagesës për pajisjen me letërnjoftim të shtresave në nevojë”.

6. Rregullat e hollësishme dhe mënyra e pagesës së kompensimit të Postës Shqiptare sh.a. për çmimin e letërnjoftimit, përcaktohen me udhëzim të Ministrit të Financave.

7. Zyrat e aplikimit të mos pranojnë aplikime në periudhën 18.6.2009-30.6.2009. Në këtë periudhë zyrat qëndrojnë të hapura vetëm për shpërndarjen e letërnjoftimeve.

8. Efektet financiare, që rrjedhin nga zbatimi i këtij vendimi, të përballohen brenda fondit të përcaktuar në pikën 7 të vendimit nr.366, datë 15.4.2009 të Këshillit të Ministrave “Për kompensimin e pagesës për pajisjen me letërnjoftim të shtresave në nevojë”.

9. Shkronja “dh” e pikës 4 të vendimit nr.366, datë 15.4.2009 të Këshillit të Ministrave “Për kompensimin e pagesës për pajisjen me letërnjoftim të shtresave në nevojë”, nuk zbatohet për kategorinë e shtetasve të parashikuar në pikën 2 të këtij vendimi.

10. Ngarkohen Ministri i Brendshëm, Ministri i Financave dhe Posta Shqiptare sh.a., për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha

FORMULAR
VETËDEKLARIMI PËR PAJISJE ME LETËRNJOFTIM

Të dhëna personale				
Emri	Mbiemri	Atësia	Vendbanimi	Dokument identifikimi

Kategoria e personit përfitues
Person pa pasaportë dhe që nuk e ka emrin në listën e shtetasve që nuk kanë pasaportë.

Marrje përsipër përgjegjësie për të dhëna të rreme
Deklaroj me përgjegjësinë time të plotë ligjore se nuk disponoj pasaportë dhe/ose nuk kam përfituar kupon nga asnjë skemë kompensimi për efekt aplikimi për letërnjoftim. Pranoj se çdo deklaram i rremë për sa më sipër përbën vepër penale dhe dënohet me gjobë ose me burgim deri në 4 vjet sipas nenit 144 të Kodit Penal.

Data:

Emër/Mbiemër/

Firmë
